

BOŠNJAKINJE PROTESTUJU ZBOG IZMJENE LUKIĆEVE OPTUŽNICE

Author: [IWPR](#)

(TU br. 471, 6. oktobar 2006.)

Udruženje žena žrtava rata organiziralo je 5. oktobra skup ispred zgrade Ujedinjenih nacija u Nedžarićima (Sarajevo), a u znak protivljenja zbog toga što pomenutom optužnicom – ni prije ni nakon što je u junu 2006. izmijenjena – nije obuhvaćen i zločin silovanja.

U zgradi UN-a nalazi se i središte Haškog tribunala za Bosnu.

Kao bivši lider zloglasne srpske paravojne formacije pod nazivom „Bijeli orlovi“ ili „Osvetnici“, Lukić je trenutno optužen za ratne zločine i zločine protiv čovječnosti.

Učesnice protesta pak tvrde da je on, u vrijeme dok je predvodio pomenutu jedinicu – koja je u periodu od 1992. do 1994. djelovala na području opštine Višegrad na jugoistoku Bosne – silovao veliki broj bosanskih Muslimanki.

Jedna neimenovana učesnica protesta ispričala je lokalnim medijima kako se 1992., u vrijeme kada je izbio rat, zatekla u Višegradu.

„Milan Lukić me je silovao u aprilu i maju 1992.“, izjavila je ona. „Odvodio me je iz zgrade u Novoj Mahali u kojoj sam boravila.“

Druga među okupljenim ženama izjavila je za državni BH Radio1 da je vidjela kako joj majku „odvode da bi je zlostavljali“.

„I ja sam, iako sam imala sedam godina, bila prisiljena da se svučem“, rekla je ona. „Okupile smo se kako bismo Tribunalu poslale poruku da nam barem djelimično olakša bol koju osjećamo.“

Udruženje žena je poslalo apel kojim se od Vijeća sigurnosti UN-a traži da Haški tribunal nastavi sa radom sve dok ne uhapsi barem Radovana Karadžića i Ratka Mladića – odnosno, bivšeg političkog i vojnog vođu bosanskih Srba, koji se nalaze na spisku najtraženijih.

Predsjednica Udruženja, Bakira Hasečić, izjavila je za BH Radio 1 kako je „očigledno da Vijeće sigurnosti uskraćuje podršku Tribunalu“.

Hasečićeva je navela da Vijeće sigurnosti vrši pritisak na Tribunal da što prije okonča rad. Time se, po njenim rečima, ignoriraju stotine silovanih djevojaka i žena.

Location: [Bosnia and Herzegovina](#)

Topic: [Kratke Vesti](#)

Source URL: <https://iwpr.net/sr/global-voices/bo%C5%A1njakinje-protestuju-zbog-izmjene-luki%C4%87eve-optu%C5%BEnice>